

東
華
續
錄

東華續錄

同治九十七

臣王先謙敬編

臣張式恭恭校

五月己卯以王大經爲湖北按察使

由江蘇江安鹽道遷

○壬午雨

上詣

大高殿報謝○甲申景廉等奏籌臺站事宜詔如所議行○乙

酉德英奏整頓東三省捕務上嘉之○戊子諭軍機大臣等成

祿奏陝回大股突竄出關情形危急一摺據稱東來大股賊匪約

有萬餘悉竄出關自惠回堡至赤金連營數十里擾及白楊河屯

莊後面並無追兵訊據獲賊供稱白彥虎等逆因肅逆馬四乞援

率黨由扁都口西出至肅州塔爾灣一帶紮營馬四不放入城白

彥虎遂傳知賊眾出口全到赤金意欲赴紅廟子等語前據左宗

棠奏官軍襲破塔爾灣賊巢賊眾潰竄白彥虎已被槍傷其竄向

大覃灘黑山峽之賊人數不多似賊股漸已窮蹙此次成祿所奏則稱賊係全數出關勢甚猖獗情形不甚相符成祿所部本單豈能遏賊狂竄左宗棠當嚴檄追剿之師跟蹤進擊迅掃逆氛不得以驅賊出關遂爲了事金順著懷遵疊次諭旨帶兵剋期西行接統成祿所部將此股竄匪悉數殲除毋得稍事遷延致成滋蔓將此由五百里各諭令知之○庚寅諭軍機大臣等劉嶽昭岑毓英奏官軍攻克雲州城池勦辦川滇邊界匪徒情形各一摺記名提督楊玉科等於克復順甯後進攻雲州力戰月餘先後斃賊甚多旋於四月初二日攻破城池逆酋悍賊悉數殲除勦辦甚爲出力見在雲州旣克軍威愈振騰越等處之賊自必聞風膽落著劉嶽昭岑毓英督飭李維述等迅速攻勦力圖掃蕩一面飭楊玉科統軍繼進合力圍攻以期早日蕆事其小猛統等處賊黨並著嚴飭

官軍一律剿除母任久踞川滇邊界游練勾結土匪郭心齋在仁富鄉等處聚眾滋事經昭通兵團會同川省防軍進剿當將首匪擒獲並斃餘黨數百名地方業已肅清辦理尙爲迅速惟川滇連界地方崇山密箐路徑紛歧賊黨此拏彼竄難保無漏網餘匪復行嘯聚著吳棠劉嶽昭岑毓英飭令該地方文武舉辦團練編查保甲隨時認真緝捕消患未萌不可稍涉大意此次在事出力文武員弁兵團著准其附入興義府城案內擇尤保奏母許冒濫將此由五百里各諭令知之○以崇綺爲內閣學士候補內閣學士○予雲南陣亡遊擊伍起雲祭葬世職○壬辰撥荊州駐防官兵五百五十名移補乍浦滿營缺額○乙未諭直隸籌撥 普祥峪 菩陀峪工程銀兩○丁酉諭內閣總理各國事務衙門奏駐京各國使臣籲請覲見呈遞國書一摺見在齋有國書之駐京各國使臣著

准其覲見○辛丑諭內閣前據左宗棠奏烏魯木齊提督成祿前在高臺苛派捐輸誣良爲叛枉殺二百餘人並虛報勝仗籲請獎敘請飭廷臣議罪等語當經寄諭金順令其兼程出關接統成祿所部一面傳旨將成祿革職拏問遴派員弁押解來京嗣復據御史吳可讀奏成祿所犯情罪重大請卽從重懲辦本日據金順奏已將成祿傳旨革職拏問派員押解赴京等語已革提督成祿苛派濫殺情節極重著卽解交刑部聽候治罪○諭軍機大臣等金順奏拏問成祿押解起程派員先往接辦該軍事務一摺金順於四月二十三日派員將成祿催赴肅州傳旨拏問押解起程已明降諭旨將革員解交刑部治罪矣甘肅至京道路窵遠左宗棠當選派得力員弁協同護解並飭沿途地方官小心遞解前進以期嚴密金順以肅州城圍喫緊尙未起程西行先派副都統明春前

赴玉門一帶接辦該軍事務惟成祿所部必須金順迅往接統大加整頓方能得力且賊匪近又紛竄出關尤當隨時督隊截剿免致蔓延肅州軍務已諭左宗棠責成徐占彪勦辦金順著懷遵疊次諭旨剋期出關接統成祿所部埽蕩妖氛不得遲誤機宜致負委任至關外米糧缺乏兵食維艱金順所部軍糧著左宗棠妥籌兼顧檄令地方官設法採買轉運源源接濟以資飽騰毋稍膜視將此由五百里各諭令知之○甲辰夏至祭地於方澤

六月戊申朔諭戶部籌撥烏里雅蘇台軍餉並飭催山東等省迅解欠餉○壬子 上幸瀛臺○諭軍機大臣等金順奏酌抽馬步各營親統出關請飭左宗棠籌濟軍食文麟奏肅州回匪西竄出關派兵防守哈密隘口各一摺見在肅州回匪陸續竄出關外玉門安西俱有大股攻撲屯莊哈密亦復喫重金順自應懷遵前旨

迅速統帶馬步各隊並成祿關外之軍確探賊蹤實力追剿毋任
紛竄文麟所部兵力雖單亦當酌派隊伍與金順之軍分投夾擊
俾賊不至任意西竄哈密各隘口防務亦可鬆動該前將軍等務
當協力同心剿除此股竄匪以靖關外門戶見在安西玉門蹂躪
徧地金順所需每月糧一千石料三百石自應於關內籌辦左宗
棠素顧大局身任地方呼應較靈卽著嚴飭甘肅兩處地方
官先籌辦四箇月軍食並協濟車馬運赴玉門屯儲毋得稍有短
絀該前將軍亦不得專候軍食辦齊方行出關致誤戎機肅州合
圍已久諒可不日攻拔金順畱防各軍卽著傳諭宋慶於抵肅城
後代爲統攝免致他虞是爲至要將此由六百里各諭令知之○
日本國使臣副島種臣俄羅斯國使臣倭良嘎哩美利堅國使臣
鏤斐迪英吉利國使臣威妥瑪法蘭西國使臣熱福理和蘭國使

臣費果蓀於紫光閣前瞻覲並呈遞國書○癸丑復設山東兗州府泉州通判○庚申諭軍機大臣等榮全奏詳陳近日邊情亟圖補救一摺土爾扈特游牧屢被哈薩克竊去馬匹該蒙古未經報官因認有原馬卽將哈薩克馬羣起來作質雖有不合而俄官聽信哈薩克一面之詞不問曲直大肆搶擄將貝子固山達等拘執赴伊實屬非理榮全見已行文俄國查詢此事卽著催令該國迅速咨覆詳悉具奏此事榮全務當妥爲辦理毋任哈薩克倚勢妄行以安蒙古各處民團榮全仍當設法鈴束隨時招集安撫俾爲我用以輔兵力該署將軍見擬派員赴庫爾喀喇烏蘇一帶擇地安營訓練保衛地方卽著實力舉行不得有名無實金順著懍遵疊次諭旨迅速出關與景廉之軍聯絡聲勢相機進取以靖邊疆將此由五百里各諭令知之○辛酉諭軍機大臣等金順奏肅州

踞逆屢撲城圍經官軍擊勝一摺此次肅城回匪屢思攻撲城圍經金順督率兵弁會同徐占彪蔣東才各軍疊次擊勦獲勝見在添築卡壘縮圍緊逼該逆屢敗之餘飛走路窮自不難一鼓攻拔卽著左宗棠飭令徐占彪等軍迅克肅城毋再遲緩提督宋慶是否已抵肅州並著該大臣遵照前旨令其兼程前進以資統率見在關外情形極爲喫重肅城有徐占彪各軍足以攻拔堅城該前將軍務當懷遵疊次諭旨剋期出關毋得以肅城未克爲詞遷延不進所調察哈爾馬一千匹本日已諭知額勒和布等迅速撥調計到營尙需時日該前將軍更不可藉口馬匹未到稍有稽延致誤戎機肅城攻克後金順雖已出關其所統文武員弁曾有微勞准其擇尤酌保優予獎敘將此由六百里各諭令知之○飭江西等省迅解閩省協餉○于肅州陣亡參將陳占彪等祭葬世職○

乙丑諭軍機大臣等景廉奏帶隊馳赴古城查看前敵情形並請飭臺站籌備駝馬運解礮位軍火各摺片景廉已於四月間馳抵古城卽赴濟木薩地方察看營壘該處地當扼要且南山一帶與烏魯木齊吐魯番踰路可通烏屬回逆與安集延時合時離情形叵測景廉惟當督飭各營官軍認真訓練勤加偵探毋稍疎虞該都統擬於木壘河一帶分紮兩營聯絡聲勢以防賊匪繞越我軍後路阻絕糧運卽著景廉就見有兵力酌度情形妥爲布置以期穩慎進取景廉兵力尙單所有綏遠城前撥之大同官兵迄今尙未拔隊該軍應需行餉業由景廉咨催陝西河南迅將銀五萬五千兩埽數解綏並飛咨山東於欠解新疆及景廉專協各款內迅速籌撥銀四萬兩運解綏城以爲該軍起程之費卽著定安妥爲布置飭令此項官兵刻日啟行速赴景廉軍營以資防剿成祿所

部吉林黑龍江馬隊並李天和三營迄無西進消息成祿所帶各隊已歸金順接統前經疊次諭令該前將軍迅速出關與景廉一軍聯絡聲勢該前事機緊要著金順懍遵疊次諭旨剋期出關不准稍涉遲延恐滋貽誤其吉林黑龍江馬隊並李天和三營卽著金順飭令迅速馳赴景廉軍營助剿毋稍延緩金順出關後兵力目厚能否再行添撥步隊數營前往景廉軍營以壯聲威之處著該前將軍妥籌辦理黎獻由湖北購辦礮位軍火等項業經分起啓程由河南山西歸化城取道蒙古前進著定安於此項軍火經過綏遠城時迅卽撥給一半官駝俾資運解其一半卽著派委妥幹之員會同黎獻就近設法雇覓商駝一併送至濟斯洪果爾臺運解到營以期迅速並著額勒和布奎昌轉飭蒙古各軍臺一體支給駝馬應用俾免阻滯將此由六百里各諭令知之○山東巡

撫丁寶楨奏按察使長賡請於陛見後回旗補制得旨長賡著俟

來京陛見後賞假百日在旗補制○丙寅命英奎來京以裕寬爲

陝西按察使

由福建鹽法道遷

○丁卯左宗棠奏三月二十六日勦撫卡

勒工事竣陳湜移軍甘都工查訪該工回民當河南三工逆回渡河抗拒官軍時多係裹脅而來甘心從亂者不過數人此次聞風逃匿當飭代理巴燕戎廳喬金鏞等拏獲亂善拜牌壹五八迭巴子等八犯戮之甘都地與循化僅一河之隔循化八工撒拉大小頭目先後款營請命其下四工爲猛打工章哈工柰慢工清水工上四工爲街子工又家工大寺工蘇治工外有沿河四莊蓋附麗於街子工者陳湜以上四工上年曾堵禦馬桂源本年復攻街子逆回巢穴尙知順逆卽上四工內之又家工亦實未渡河抗拒因飭令收齊槍械俟官至循城時呈繳其街子大寺蘇治三工則勒

限先繳又子槍一千五百桿到營並備辦船筏接渡官軍開城以待方准收撫數日間均各如命辦理無敢刻延四月初四五六等日陳湜酌留數營駐甘都後路親率各軍耀隊河干成列以濟先派五品軍功回目馬占鼇馬永瑞率左右兩旗登岸而壘各軍分紮循城內外方渡河時自河岸至近城居民扶老攜幼焚香跪迎相屬於道城中民房無幾官廨荒廢殆盡而城堞尤多坍塌當派各營先修城垣兩日畢事回目鄉約及老民紛紛扶杖求見伏地涕泣號呼乞恩陳湜剴切開導曉以大義令急縛獻逆目呈繳馬械運送軍糧毀平各莊礮臺礮樓賠修衙署廟宇數者有一違誤卽予剿辦諸回聞命感激不兩旬上四工縛送最稱梟悍之積年匪首並此次倡亂渡河之馬玉連沈五十七韓麻亥馬統八十九馬亥必保查山白住麻等二十餘名下四工亦解到數賊駢戮以

徇總計回民約三千戶先後繳槍四千餘桿大礮劈山礮十六尊
凡彼中所稱金花銀裝飾珊瑚松綠極精利各槍概經追繳並出
具不存一馬一槍甘結惟番民以逐獵爲業熟番槍械令交千戶
長百戶長收管其生番逐居水草氍帳時移應准稍爲存畱以防
猛獸而護牛羊該處專恃地險槍利不習馬戰故馬不多畜然亦
已總過二三百匹連日運送軍糧男婦負載絡繹不絕各軍駐循
十四營旗不惟足資飽騰且有存糧徧勘各莊礮臺礮樓平毀已
盡其沈家韓巴兩堡牆堅厚而礮臺尤多詢係明代所築亦均拆
毀廳城衙署廟宇各回聯名具呈懇准繳賠修銀萬二千九百兩
陳湜當飭代理循化廳同知汪聲元經收辦理凡所指示各回無
不奔走爭先惟懼少延晷刻諸事既定陳湜商西甯鎮總兵何作
霖所帶老湘軍五營及回目崔偉馬隊仍回西甯令循城文武各

員到任視事並規畫巴燕戎格循化地勢全局分營擇要扼紮俾與西甯碾伯河州聲息相通互爲聯絡庶新定之地足資鎮壓陳湜率親軍回蘭州臣等竊維循化憑山阻河溝岔紛歧地勢奧險與巴燕戎格無異而八工撤回向所稱大撒拉者習俗獷鶩槍械精利則較五工撒拉爲尤甚陳湜初渡河時決計大張撻伐痛挫其鋒乃自卡勒工一戰賊負創而歸又見官軍能戰不擾威信彰明各處就撫番回均釋其疑懼之心遂各俯首帖耳惕息效順此固始願所不及也臣等見飭地方有司招徠賑撫清釐地畝嚴行保甲興建義學及舉辦一切善後事宜妥籌次第經理冀得長治久安永紓邊患見署河州知州潘效蘇稟收輯難民四萬名口見署狄道州知州謝光容稟收輯難民萬餘名口漢回相庇以安猜忿頓釋而巴燕戎循化河州各境漢回番撒大小渠目百餘赴蘭

州叩謁臣宗棠親加撫諭飭其安分守法宣布朝廷勦撫兼施之意察其情詞尙能領悟均以復同平民爲至幸也又奏三月十八日提督黃虎臣擒獲肅城逃賊供稱城賊以禮拜寺係由塔爾灣出嘉峪關大路旣爲官軍奪據竄路愈窮遂挑悍黨多名冀奪回禮拜寺以便狂竄出關十九日南門果出悍賊八九百頭裹白巾裝束殊異循城壕呼躍而來南稍門復出賊二千餘繼之圍禮拜寺勢甚兇猛提督徐占彪率隊憑壕迎擊槍礮環施黃虎臣據寺牆以洋礮劈山礮轟擊斃悍賊十餘名賊退伏壕內連放叉子槍城上槍礮如雨相持兩晝夜二十二日二更徐占彪商派各營潛師夜起令提督陳春萬參將楊世俊遊擊徐春先等由西南鈔擊提督金慶元總兵戴宏勝參將方友升等由城壕下擊徐占彪親自率隊由寺側衝擊金順亦督軍會勦均袒左臂分路齊進將近

賊前賊始驚覺昏黑中不辨官軍多少先放槍礮蜂擁來撲官軍從槍礮中衝殺斃賊頗多賊縮退城濠四鼓後忽來衝撲官軍步步緊進鏖戰良久賊死傷狼藉天明安肅道標勇丁肅州鎮標勇丁馳來策應賊敗退踞城根廢牆內然不入城據牆爲營外掘深濠又於濠內築牆憑牆施放槍礮並於濠邊長牆內潛開地道徐占彪飭於禮拜寺四面開浚深濠截之並於寺西長壕內添築礮臺移後膛礮向賊壘轟擊賊驚懼無措連日晝伏夜動以避礮子復相持四晝夜官軍更番戰守賊猶苦抗二十六日擒賊供稱開地道四處已被官軍掘濠截斷二十二夜之戰黑痣萬長及千長二名均被轟斃賊死傷以數百計並稱賊中最畏後膛礮螺絲礮將誓死來奪是日賊於西南添築礮臺施放叉子槍斷禮拜寺出入之路徐占彪飭開後膛礮轟擊礮臺立即掀倒臺上之賊盡斃

徐占彪防賊乘夜來犯豫爲部署三更後賊果猛衝官軍長壕官軍併力抵禦洋槍斃賊數十名賊仍不退天明徐占彪又移後膛礮向賊叢連放四十餘出賊紛紛倒地金順亦派隊馳來賊始敗入濠溝復相持兩晝夜徐占彪料賊必夜出令陳春萬總兵黃祖福陳登雲宋賢聲藍明泰挑壯士八百名楊世俊兩營金慶元戴宏勝方友升等三營於二十八夜三更後分三路襲擊直抵西南角城根官軍更番進攻勇氣百倍賊拚戰日久困憊已甚無復鬪志紛向北城逃竄官軍趁勢趕殺金軍亦由東北迎勦前後夾擊斃賊無算賊仍逃入濠溝始由城濠縮退入城自此以後連日閉城不出各軍加濬城濠一以防賊乘機偷越一以防賊暗掘地道四月十六日城中逃出漢民供稱賊見官軍鎖圍既合知無生路擬突圍狂竄又爲眷口所累將殺眷而逃徐占彪以同性殘忍事

或有之飭各營晝夜防守加修濠牆並於金慶元戴宏勝營外重開長濠緊偪河灘誘其出戰十八日辰刻北稍門出賊二三千直撲金慶元戴宏勝營壘圖阻官軍工作徐占彪會同金軍及楊世俊馬步分路由西北越長濠繞出賊後疾馳鈔擊賊又子槍裝放較緩不及官軍洋礮便捷往來盪決數十次斃賊百餘名午後賊始敗退背城施放槍礮城上礮聲連震官軍直前突之相持至夜賊始入城是夜官軍並未收隊十九日黎明賊復出四五百名來犯官軍一面工作一面拒戰適金順亦派隊會剿賊敗退而官軍濠牆成二十日賊放出漢民老幼婦女四百餘名口皆飢餓垂斃據稱城中糧乏以老幼婦女徒坐耗食驅之令出並稱十八十九兩日之戰賊死者不計其數見紛議殺眷出竄與前逃出漢民所供大略相同二十四日金順移營近紫湖潭賊瞭見卽出賊二三

子來爭該處地多坑坎高低不平賊伏低處放叉子槍金軍衝突
數次賊殊死戰時徐占彪派金慶元戴宏勝黃祖福宋賢聲等由
西北橫截而來並移後膛礮轟之子落開花當者立斃賊隊大亂
徐占彪又飛調楊世俊方友升陳春萬徐春先及總兵李洪超等
前來金順亦添派隊伍分四路環攻屢戰四時之久先後共斃賊
四五百名賊向北稍門狂竄因歸路已斷倉卒由南稍門入城二
十八日金順又移兩營進紮徐占彪等率各營列隊相護賊果來
犯官軍三路並進擒斬多名據擒賊馬百衣保供二十四日之戰
賊萬長馬得幅中礮陣斃計自三月十八日至四月二十八日共
斃賊千餘名傷者無數旋據宋慶續稱派所部提督蔣東才率前
軍馬步六營於五月初十日抵肅徧東城築壘十六日接仗斃賊
多名十八日復徧小北門修築一卡賊不復出宋慶續派總兵李

寶林率兩營提督馬玉崑率三營繼進二十八日親赴肅州與金順徐占彪會剿臣維肅州本邊關重鎮城高三丈六尺厚三丈有奇外環深濠二丈有奇闊可十丈逆賊馬四竊踞其中與關外援賊馬六卽馬振國拚死拒守官軍先後將城外堡壘次第攻毀見祇賸一孤城以事勢論之自可剋期攻拔惟攻堅本無善策地道一著取效較易徐占彪掘開數次每近城根被賊驚覺由城內掘濠截斷續用弗成惟後膛螺絲大礮最爲利器然以之轟堡壘轟甌石轟圍聚之賊固無弗摧以之攻堅厚土城則程功不易見據徐占彪稟賊畏後膛礮開花子如迅雷下擊見卽鼠竄所平各堡壘多賴其功惟平甌城身已用子一百六十餘顆止能深入數尺不能迸裂雖將東門城樓轟塌並甌倒城中房屋數處賊中惶懼特甚然終爲堅壙所隔官軍不能入城也臣令將所儲銅鐵合式

礮子悉數解肅交臣派去之總兵銜副將鄧增管放計土城雖堅厚異常然連注施放層層掣卸計或得手通計前後起解礮子一千五百餘顆見存營尙九百餘顆計可足用至賊糧漸少踞賊屢思竄出關外而各營鎖圍密合愈偪愈緊城中號呼喧嚷營中亦時聞聲息見據各營稟報及金順徐占彪緘牘均言克復之期必當不遠臣未敢頻加迫促但飭徐占彪加緊轟攻毋須肉薄登城致傷精銳一面廣儲糗糧冀竟全功一面豫行申儆嚴禁各營爭攫財物致墮奸謀違令爭功致滋疏漏冀堅城速下早慰宸懷又奏竊臣欽奉諭旨金順斟酌出關事宜著左宗棠另派隊伍迅赴肅州會勦金順所部軍糧仍著左宗棠飭屬妥籌接濟臣於四月二十二日奉到後卽傳知宋慶先飭所部分駐甘州之提督蔣東才一軍步隊五營馬隊一起馳赴肅州隨同徐占彪進勦宋慶

親率全軍繼進俟金順移營卽時填紮以防城逆伺間突竄旋據宋慶報蔣東才馳抵肅城結營於金徐兩軍間接仗獲勝旋又越長濠徑薄東門分築營卡宋慶由涼州進駐甘州一俟糧運兩事稍有端緒卽開拔續進竊意宋慶全軍較金順所部人數爲多兵力足敷無庸增調隊伍金順本應懷遵諭旨剋期出關臣何敢代爲瑣陳仰煩聖鑒願就關內事勢言之實有難於迫切者肅甘兩郡物產素饒回亂以來屢遭蹂躪加以亢軍坐食多年捐派煩苛民不堪命近雖易捐派爲採買流亡漸集耕墾稍多然各處水地如常而原地山地未能復舊兼之今歲雨澤甚愜農民耕種失時將來收穫豐歉殊難豫定又值青黃不絕之時舊糧旣已搜括無餘新糧收穫尙早屢接甘涼安肅各屬稟報均苦無從籌措委係實在情形此辦糧之難也關外轉運向本專用駱駝不宜車馱

以地多戈壁水草缺之非騾馬所宜亦非民車木輪所便轉運一次損耗必多非若駝隻之可以負重耐久而又不擇水草也惟駱駝一項實行商所需農家素少餵養金順原帶駱駝據稱僅祇賸二百餘隻又疲乏不堪此外各軍雖有奪獲然各私爲己有搬運柴薪糧料亦難責其借供出關之期金順疏稱出關數營計每月需糧一千石料三百石以甘肅州斗斛合計斤重糧一千石重三十餘萬斤料三百石重九萬餘斤以一月運糧料赴玉門之數計之每駝一隻每月僅能兩次往返負運止五百斤非共用駝八百隻不敷周轉而負運軍裝軍火不與焉若全軍出關則糧數增至數倍卽駝隻亦增數倍而由涼運甘由甘運肅計程九百餘里需用車馱騾馬不與焉無論關內外商賈絕迹駝無可雇卽內地民間應差之騾驢車輛供由涼運甘由甘運肅亦實不敷周轉此

猶僅就金順全軍及兼統成祿各營而言亦僅就玉門一處而言也若將來出關之軍尙議增竄駐軍之地不僅玉門則更無從籌措此轉運之難也臣奉諭籌辦金順出關糧運責無容諉竊以肅州被禍最重產糧無多向資甘郡轉輸灌注而甘郡近因客軍雲集採辦已空又不能不藉資涼郡糧石灌注接濟見飭解銀赴涼廣爲採買以裕糧源雖併運腳合算所費過多然欲籌濟飢軍則勢不容已至由涼運甘計程四百八十里由甘運肅計程四百二十里民間車馱騾驢因軍興轉饋頻煩彫耗疲乏萬難再加迫促見飭甘涼所屬通共勻撥臺車二千輛照東路見章每糧百斤每運百里由官津貼腳價制錢四百餘文軍餉軍裝軍火按斤重照給津貼此外官私來往差務概行禁用臺車庶民困稍紓得豐其芻豆以資餵養而畜力漸充饋運乃期無誤其狹瘠衝繁各缺飭

由鄰近州縣協濟臺車以均苦樂又民間臺車二千輛分布九百餘里計每百里僅分車百輛有奇而往返裝卸歇養時有耽閣不能計程限以時日遇糧餉軍火紛至沓來每多停待積壓之患見查東南兩路運務稍簡調取各局官騾官車約計健騾一千五百餘頭分赴涼甘各屬以助臺車轉運肅州此後仍當隨時湊添此籌辦關內轉運之大略也至關外轉運利用駝隻內地無從購覓自宜於產駝地方廣爲採取向來調取各旗駝隻均難得用徒費餵養見派員赴喇嘛廟一帶重價購買定以五六歲外臚壯健實者爲佳又擬派員赴阿拉善旗烏拉王公等處採購爲隨時添補之用惟駝隻於五月歇廠八月起廠此四箇月內正值換毛怯熱之時不宜赴運入秋則天高氣爽任重行速損耗必少此籌辦關外轉運大略也竊維糧運兩事爲西北用兵要著事之利鈍遲速

機括全繫乎此千鈞之弩必中其機會而後發否則失之疾與失之徐亦無異也西路各郡之糧收穫恆在八月茲值舊穀既沒新穀未升之時遽籌採購則非其時關內車馱騾驢在官初議分撥在民初議津貼運路尙未暢行遽籌灌輸則力有未逮駝隻尙在歇廠採齊到肅連閏計算亦須在八月之交遽籌轉運縱零星湊集亦違其性且亦斷不能多臣愚竊謂金順全軍出關所慮不在圍肅之師失其臂助但恐迫促成行勞費萬狀於事無益而又害之金順亦心知其難而自請親率數營出關亦因嚴旨詰責不暇籌及後路糧運情形關外用兵機局迫而出此臣愚竊謂金順既暫難出關卽如所請親率數營先行亦屬無益以言整飭成祿各營則成祿所畱玉門僅止步隊一營馬隊一起既委明春料理自期周妥無須金順親行以言追勦白彥虎股逆關外聲息久隔文

報不通安肅道史念祖飭安西敦煌確探馳報尙未接其稟牘惟據玉門安西陸續逃至關內者約八百餘戶傳言賊蹤已近敦煌至賊數多寡則亦未能確指金順出關數營難言確有把握如圖前進仍須從關內續籌糧運玉門距肅州已三百六十里矣若再前進糧無可籌運何能辦其勢必仍羈滯玉門坐食關內至艱之糧而已臣擬商之金順如果親率數營出關或卽先派營哨分紮嘉峪關雙井子惠回堡赤斤堡火燒溝腰泉子井子一帶作爲尖宿臺站各蓋造駝廐掘井刈草以待計八月新駝到肅新糧上市是時肅城亦必得手然後全軍次第西發暫憇玉門徑指安西敦煌乃爲得勢臣之愚計竊以秋仲出關師期雖遲兩月而局勢似爲穩慎疊據前敵各軍安肅甘涼各道緘牘所言情形不謀而合謹據實馳陳伏乞 聖慈指示機要以便遵守其宋慶所部尙有

數營畱駐甘郡宋慶已遵旨赴肅臣見咨商將畱甘各營暫緩開拔張曜見率所部馳抵鎮番就水草臣咨請暫駐鎮番一帶靜候諭旨緣攻肅各軍皆言鎖圍密合兵力足敷惟虞大軍併聚一隅軍食缺乏之故也上諭軍機大臣等循化廳城既經收復惟收輯難民甚多一切善後事宜亟應次第興辦著左宗棠豫師飭令該地方官認真經理妥爲撫綏以期一勞永逸左宗棠所奏三四五月間官軍圍攻肅州踞匪疊獲勝仗與金順前奏情形大略相同見在宋慶所部提督蔣東才等營亦已行抵肅州偪城築壘各營鎖圍嚴密賊膽已寒第窮極思竄亦在意中著左宗棠飭令徐占彪宋慶督率各營實力圍剿務將此股賊匪就地殲除毋得縱令他竄致貽後患至關外用兵糧石車駝自應豫爲籌畫方可師行無阻自肅州一帶被賊蹂躪以後籌辦一切均屬不易此種情

形朝廷亦所深悉但以西路軍情緊要未便置爲後圖且景廉見已率隊進抵古城後路尤須有軍策應方可聯絡聲勢節節進規是以疊次嚴諭金順剋期出關以期迅赴戎機茲據左宗棠奏稱見在新穀未收軍糧缺乏橐駝亦值歇廠怯熱之時不能負重若展遲兩月於八月間拔隊西行局勢似較穩慎等語所籌亦係實情惟白彥虎賊股見又竄擾關外安敦玉等處情形緊急盼兵尤切金順仍當趕緊部署統軍出關相機剿辦如一時實因糧運車駝未能應用或派撥數營先行進發以資接應之處著金順酌度情形妥籌辦理金順需用糧石車駝等項仍著左宗棠飭令該地方官速爲籌備毋稍延誤將此由五百里各諭令知之○左宗棠奏臣前因肅城援賊剿辦後餘黨有竄入南山者當卽咨商宋慶飭分駐甘州提督蔣東才就近接捕旋接宋慶牘開四月十八日

蔣東才偵知甘郡西北七十里板橋地方有賊騎擾掠蔣東才率隊擊之詎知距營七十里神仙廟有賊二百餘騎蔣東才令參將胡永清都司徐心友參將劉知儉由河下鈔出偏賊入山東口而自率各營徑擣賊巢縱橫奮擊斃賊頗多生擒二十餘名餘賊鼠竄訊據擒賊供稱此股乃馬景瀝所帶賊黨及男婦共五六百名踞山東內轉腳湖爲巢馬景瀝赴肅州此股交回目馬四帶領昨以二百餘騎向神仙廟靜安廟一帶掠食忽爲官軍擊敗馬四並被官軍陣擒矣轉腳湖距神仙廟八十里十九日蔣東才復率隊前往搜捕賊見官軍至男女多投巖死餘眾抗拒官軍立將賊巢踏破生擒回目董福馬見齡等此股擒斬殆盡甘州府稟報境內無賊報聞○庚午飭廣東等省迅解貴州協餉○以阿昌阿爲內閣學士

由太常寺卿遷

○乙亥諭軍機大臣等文麟奏大股陝回攻撲敦

煌縣城並哈密回王呈請禁糧出境慶壽奏東路逆匪出竄布置城防各一摺據文麟奏稱探聞陝回於四月間竄撲敦煌約有萬餘攻陷新店子一帶屯莊並圍攻縣城道路梗塞文報不通等語逆匪紛竄關外勢甚猖獗見在賊蹤既擾及敦煌哈密東路甚形喫重馬蓮井防軍單薄文麟務當添派兵勇擇要駐紮聯絡防勦力杜西竄之路所有派援敦煌之軍並著飭令迅速前往相機策應賊匪有欲竄入敦煌山內前赴西路之說巴里坤城防亦屬緊要著慶壽酌募得力勇丁認真訓練將防守事宜妥爲布置毋稍大意前據左宗棠奏金順一軍因籌辦軍糧駝隻未能剋日啟行業經諭令金順趕緊部署出關或派撥數營先行進發以資接應見在關外賊勢蔓延望援甚切該軍尤宜豫爲料理早日出關以期迅掃逆氛成祿舊部各營前據金順奏稱已派明春前赴玉門

一帶接統並著飭令妥爲整頓遇賊卽擊迅赴戎機據文麟奏稱回王邁哈默特等以哈密產糧僅足供本城兵民之食呈請禁止販賣出境等語自爲慮及乏食起見見在景廉進紮古城後路糧運必須源源接濟巴里坤亦係瘠苦之區所產糧石無多尤非安敦玉一帶可比儻有奸商私販出境希圖牟利或有暗中接濟賊匪等情自當明白曉諭設法禁止但不可概行遏糴致誤軍情將此由五百里諭知左宗棠金順文麟並傳諭慶壽知之○諭榮全奏征兵途次截畱請飭催速進並探聞賊情各摺片前因榮全奏調杜嘎爾軍營馬隊當諭該副都統檄飭福珠禮一軍剋日進發馳赴榮全軍營其黑龍江官兵並著接續前進茲據榮全奏福珠禮所部共吉林黑龍江官兵三百八十餘員名內黑龍江馬隊一百八十餘名見經常順全數截畱僅飭吉林一隊前進該處兵力

過單請飭催截留征兵速進等語見在纏頭萬餘有由沙山子竄赴西湖之信是庫爾喀喇烏蘇一帶軍情甚迫榮全所部過單不敷布置所有烏城截留之黑龍江馬隊著常順軍林多爾濟仍飭併歸福珠禮統帶剋日撥赴榮全軍營以資防剿沙山子等處見在同情若何榮全當就見有兵力妥爲防範毋稍疏虞將此由五百里各諭令知之

閏六月壬午嚴諭奉天吉林飭屬清釐積案○甲申諭內閣前據軍機大臣六部九卿會議喬松年文彬丁寶楨並御史游百川所奏籌辦黃運兩河情形當經諭令李鴻章妥籌辦法據實詳細具奏茲據奏稱銅瓦廂決口後舊河身淤墊過高歲久乾隄無從修治勢難挽復淮徐故道且於漕運無甚裨益至借黃濟運築隄束水工程均無把握與導衛濟運之法同一難行各等語所奏頗爲

詳盡河流既難挽之使南而利運又別無長策李鴻章請仍由海道轉運令各督撫酌提本色若干運滬由海船解津其餘仍照章折解以省運費並隨時指撥漕折銀兩採買接濟著戶部通盤籌畫妥議具奏河流趨重山東自應增立隄防著丁寶楨酌度形勢將張秋利津一帶舊有民埝加倍堅固以資捍衛其侯家林決口見雖堵築合龍仍恐民埝不能久恃並著該撫於秋汛後詳細勘估酌籌款項將侯家林上下民埝仿照官隄辦法一律加高培厚設法守護沿河各州縣民人田地久被淹沒情殊可憫卽著查明分別奏請蠲緩錢糧並將海口鹽場商運各事宜酌量變通辦理以示體恤至銅瓦廂決口以下蘭儀東明一帶地勢平行不可無遙隄以防泛濫著喬松年就近察看應如何量築隄埝以資保護卽行悉心籌辦淮徐故道涸出舊河身民間多有占種該督所請

酌議升科之處著江蘇河南山東各督撫體察情形妥籌具奏另片奏請旨停止河運採買糧石推廣海運等語著戶部議奏○乙酉諭張樹聲撥銀二萬兩充歸化城轉運經費○丙戌諭內閣原任大學士朱鳳標老成端謹學問優長由翰林洊擢正卿疊司文柄朕御極後命充上書房總師傅簡任綸扉管理部務均能恪恭將事克稱厥職上年患病疊經賞假調理嗣因固請開缺准予致仕賞食全俸方冀訓養就痊遐齡永享遽聞溘逝悼惜殊深著加恩追贈太子太保銜賞給陀羅經被派肅親王隆懃帶領侍衛十員卽日前往奠醊所有任內一切處分悉予開復應得卹典該衙門察例具奏伊子主事朱其煊著俟服闋後以工部郎中遇缺卽補伊孫監生朱有基著賞給舉人一體會試用示眷念耆臣至意尋予祭葬諡文端○諭劉嶽昭岑毓英奏官軍攻克騰越廳城並

各處賊巢雲南全省肅清一摺覽奏實深欣慰雲南自雲州克復後提督和耀曾督軍進攻小猛統本年四月十五六等日該逆連次出撲疊經官軍擊敗生擒首逆僞大將軍馬應紅等復乘勝由寨後禮拜寺攻入殲賊多名當將小猛統攻克各軍進攻騰越廳城三月初三初七等日先後攻克烏土寨馬家村堅巢並將城外賊營木城礮樓概行掃蕩直薄城下李維述等督軍四面合圍開挖地道五月初三日夜間轟陷城垣十餘處各軍蟻附而進該逆紛紛潰逃官軍內外夾擊殲除僞大司強馬汰廉等首從二千餘賊當將騰越廳城克復全省一律肅清仍著劉嶽昭岑毓英督飭各軍將餘匪悉數剿滅務絕根株滇省逆匪自咸豐六年倡亂以來攻陷城邑荼毒生民十有八載上年大理克復巨憝伏誅後其餘黨猶敢分踞順甯等處負隅死抗此次經劉嶽昭岑毓英等分

飭各軍以次攻拔各該將士同心敵愾迅速蕲功深堪嘉尚雲南
巡撫岑毓英親臨前敵調度有方用能肅清全省著賞加太子少
保銜該撫前經賞給騎都尉世職著加恩改爲一等輕車都尉世
職雲貴總督劉嶽昭籌備戰守克竟全功著賞穿黃馬挂雲南開
化鎮總兵楊玉科戰功卓著前經賞給騎都尉世職著加恩改爲
一等輕車都尉世職總兵李維述提督段瑞梅蔣宗漢徐聯魁均
著賞給雲騎尉世職○諭雲南自軍興以來迄今十有八年郡縣
城池大半被賊蹂躪小民顛沛流離深堪矜憫見在地方甫就肅
清流亡未集若將積欠錢糧照常徵收民力益形拮据著加恩將
同治十一年以前民欠錢糧概行豁免其應徵錢糧著該督撫督
飭地方官認真清查分荒熟地畝酌量徵收成數奏明辦理該省
前因軍務緊要調派各屬鄉勇協同官軍助剿抽收釐穀接濟軍

糧閭閻不無苦累並著自本年以後永遠停止以紓民力該督撫
卽刊刻謄黃徧行曉諭務使實惠均霑毋任吏胥舞弊用副朕軫
念民艱至意○諭軍機大臣等劉嶽昭岑毓英奏官軍攻克騰越
廳城及小猛統等處賊巢一摺雲南回匪之亂歷時十有八年自
上年冬間攻克大理府城後節節進剿迤西賊巢次第掃蕩見在
騰越既克全省一律肅清覽奏實深欣慰滇省久被賊擾民生困
苦茲幸羣匪廓清亟應慎選牧令整飭吏治加意撫綏俾得各安
生業其有著名賊黨漏網伏匿者仍當嚴密按捕以絕根株該省
餉項本形支絀岑毓英另片奏稱擬將粵勇先行遣撤其餘各營
俟由騰越撥回分別撤留卽著該撫妥爲辦理以節餉需並督飭
管帶各員嚴加約束毋任滋生事端又據奏前署騰越鎮總兵明
慶前署保山縣知縣鮑廩均因失守城池久陷賊中見在先後逃

出等語該員等於城陷後覩顏苟活是否甘心從逆抑實係被賊拘畱所供各情有無捏飾著劉嶽昭岑毓英確切查明將該員應得罪名定擬具奏將此由六百里各諭令知之○諭曾璧光周達武奏新城防勇索餉滋事見經全數殄滅一摺本年四月間駐防新城之經左新前兩營哨長什長丁發桂等同勇丁五六百人鼓譟索餉由外城進攻內城分黨往攻興義府城官軍分路剿辦將逆首丁發桂楊得城殲斃並將陶甫承何玉亭黎正關先後擒獲餘匪無一漏網見在興義等處是否業已安靖著曾璧光等妥爲彈壓尤宜加意拊循黔省上下游隨處皆有防軍無軍不有欠餉萬一相率效尤殊屬不成事體曾璧光周達武務當先事豫防隨時安撫毋令再滋事端將此由六百里諭知曾璧光並傳諭周達武知之○予貴州新城遇害道員周康祿祭葬世職如二品官例

交國史館立傳於死事地方暨原籍建祠革救援不力副將劉百魁職永不敘用○予貴州陣亡知州楊見龍等祭葬世職○予雲南殉難副將魁昌祭葬世職建祠陣亡知州吳景蘇等祭葬世職附祀○以籌備雲南軍需予前任成都將軍崇實等優敘○甲午以京畿久雨 上詣 大高殿祈晴○丙申詔戶部查各省畝捐釐捐及徵收丁漕違制者次第奏請豁免○己亥命刑部右侍郎廣壽赴奉天審辦案件○辛丑諭內閣前因都察院奏殉節人員應不准由同鄉京官呈請予諡當經降旨令該處紳民呈請各該督撫及都察院衙門查覈具奏毋庸由同鄉京官具呈聲請因思易名之典所以褒卹大員其有名不副實者雖秩登一品未經予諡所以示彰瘡之公至嚴且慎溯自軍興以來文武各員中有戰功早著爲中外所共知者因督兵大臣詳敘事蹟奏請予諡亦經

加恩允准乃近來中外臣工往往將殉節道府州縣等官懇請予諡該員等矢志報國朝廷旣優加贈卹並廕及子孫所以褒獎忠藎者不爲不至儻將易名重典視爲矜恤常例紛紛陳請殊屬非是嗣後文武各員其官階例不予諡者如果動名懋著自當破格施恩臣下不得率行奏請以示限制○諭軍機大臣等景廉奏回逆大股出關滋擾敦煌請飭金順來古助剿並請飭榮全進兵會攻瑪納斯各摺片陝回白彥虎會合西甯大股回逆攜帶家眷萬餘眾出關滋擾敦煌及西海蒙古一帶地方攻破村堡官兵堵剿連獲勝仗後因賊眾兵單官軍挫衄李天和陣亡胡飛鵬被擄勇丁散亡大半此軍本係赴坤助剿之兵刻下將亡勇潰已不成軍景廉兵力甚單防剿均形棘手該逆此次勾結甘回攜眷出關沿途擄掠必爲西甯烏魯木齊之計該處南北兩路皆有徑路可通

景廉惟當就見有兵力勤加偵探設法截剿一面飛咨哈密巴里坤兩城嚴密防守毋稍疏虞金順一軍前經疊次諭令迅速出關以厚兵力見在哈密古城各處事機甚急卽著該前將軍懷遵疊次諭旨速帶馬步各營兼程西進爲景廉後路應援並與景廉會商機宜迅埽逆氛毋得藉詞延緩回目馬明既有投誠之意景廉惟當設法羈縻總使安夷回逆勢不相聯庶免掣肘但回情詭譎投誠未可深信景廉持諭招撫總宜穩慎籠絡計出萬全毋爲該回所紿是爲至要俄商前赴瑪納斯貿易該處正爲賊匪出沒之區貨物被搶勢所必至俄商遠指爲徐學功搶劫景廉見已札調徐學功來營面詢並派員前往查訪虛實自無難根究卽著景廉查詢明確將如何辦理之處卽行據實奏聞官軍能將瑪納斯剋期攻拔先發制人兵機庶可得手著榮全咨會錫綸迅速會兵進

攻務將瑪納斯攻克以期次第進取榮全亦當安籌攻剿迅赴戎機毋稍遲誤將此由六百里諭令知之○永定河溢○予故直隸總督慶祺附祀僧格林沁天津專祠江蘇道員袁保慶附祀袁甲三臨淮專祠○丙午予貴州陣亡副將吳喜榮等祭葬世職

秋七月丁未朔享 太廟○己酉諭軍機大臣等金順奏攻克肅州東關平毀賊卡一摺肅州自合圍後金順會商徐占彪宋慶添築礮臺偪城轟擊上月初六日徐占彪督隊出賊不意直登東城各軍奮勇繼進賊眾抵死抗拒分股出城撲犯官軍營卡冀圖牽掣各營分投迎剿大挫兇鋒遂將東關攻克並將蒲桃園賊卡平毀悍賊悉數殲除剿辦尙爲得手東關攻克城賊糧畜將盡已成檻獸釜魚著左宗棠檄令徐占彪宋慶等併力環攻嚴防賊匪衝突迅將肅城剋期攻拔聚而殲旃毋稍鬆勁肅州軍務得手徐占

彪宋慶兩軍足敷勦辦白彥虎等股竄擾關外勢甚猖獗金順仍當懷遵疊次諭旨迅帶所部兼程西進爲景廉後路應援相機痛埽妖氛毋稍遲滯另片奏請將已革委參領雙壽畱營等語雙壽係勒令回旗永不敘用之員所請畱營效力之處著不准行將此由六百里各諭令知之○諭本日據金順奏肅州兵勇圍攻甚密指日可期克復是甘省軍務漸就肅清因思見在各營勇丁固多他省客勇而本地募勇亦復不少此項勇丁招自田間半係無業游民以之衝鋒禦寇不過一時權宜之計無事時恐未必能安耕作若任其游蕩不爲鈴束致令流爲匪徒不但無以示矜恤亦非綏靖地方之道甘肅各營兵丁缺額甚多凱撤以後應如何將本地募勇挑補訓練以資安插之處著左宗棠悉心酌度情形奏明辦理其各省勇丁亦當分別撤畱其得力者飭各營官實力整頓

不得力者妥爲資遣俾免滋事並著先事豫籌以遏亂萌將此諭令知之○予甘肅陣亡總兵官黃金臺等祭葬世職○辛亥諭軍機大臣等劉長佑馮子材奏西隆西林踞匪悉數殲除裁併各軍並疊獲匪犯情形一摺西隆西林兩屬之峯崗巖毛草坪等處賊巢經官軍先後攻克斃賊多名惟該處近接黔疆匪蹤出沒無定難保無餘黨竄伏仍著劉長佑等督飭該處地方文武實力搜拏以清餘孽防剿越南各軍見經馮子材簡汰挑畱分紮關內外其鎮安歸順及各土州要隘亦經覃遠璉派營分駐卽著檄飭該鎮道扼要嚴防毋稍疏懈吳逆餘黨蒙艾等竟敢由越南潛回勾結滋擾雖經拏獲正法此外漏網者尙恐不少劉長佑等仍當嚴飭沿邊各營一體搜捕務絕根株並飭各該處地方官將善後事宜統籌全局妥爲辦理將此由四百里各諭令知之○癸丑諭軍機

大臣等文麟奏陝回竄擾敦煌見催馬隊會剿並賊匪分竄哈密邊界各摺片陝回大股眾約萬餘出關滋擾敦煌攻陷屯莊焚燒搶掠官軍接仗失利李天和陣亡兵勇死亡過半與景廉前奏大略相同見在賊勢猖狂均向北山飛竄深恐沿途勾結勢成滋蔓難圖文麟所派馬隊官兵復爲河漲所阻未能前進敦煌兵勇無多勢難堵禦著文麟飛飭馬隊營官張明等迅速設法繞道前赴敦煌會同該處官兵實力剿辦毋稍疏虞並著文麟分飭東路沿塘駐防並塔爾納沁一帶各營勤加偵探認真防堵金順一軍疊經諭令迅速出關刻下關外軍情緊急著該前將軍懷遵疊次諭旨剋日拔隊起程迅赴戎機毋得稍有遲誤明春所帶成祿數營見紮何處著金順檄令就近兜剿以遏兇鋒該逆向西竄擾其心叵測哈密古城各處防堵未可稍鬆著景廉會商文麟各就見有

兵力設法堵剿毋任賊匪紛竄哈密邊界馬金山一帶竟有賊匪三百餘名盤踞並有青海回逆四萬餘名到肅被官兵擊敗竄往古城俱有北犯之意文麟務當飭令在防官兵扼要嚴防遇賊卽擊毋稍疏懈將此由六百里各諭令知之○乙卯諭軍機大臣等楊昌濬奏黨匪聚眾滋事立時撲滅一摺浙江新昌縣烟山地方向有黨匪出沒疊經捕獲懲辦楊昌濬飭令該縣編查保甲匪徒王城繼等因挾紳董協獲黨首何則秀之嫌起意聚眾滋擾羣至紳士楊禹疇等家拆毀房屋復勾結天台東陽匪類於閏六月初四日擁眾數千圍撲縣城當經官軍奮力截捕斬擒黨匪百餘名餘眾散逸其竄往關嶺之匪亦經守卡弁勇擊散惟匪首王城繼等在逃未獲著楊昌濬嚴飭密速緝拏務獲懲辦毋任漏網一面將保甲事宜認真辦理並收繳器械嚴申禁令以靖地方前署新

昌縣知縣王嘉瑞於黨匪挾讎焚搶未能先事籌防著交部議處該管知府及地方營汛事前疏於稽察本有應得之咎姑念會督防剿卽時撲滅功過尙足相抵均著免其置議所有出力員弁著俟匪首王城繼等悉數緝獲後再由該撫擇尤保奏毋許冒濫將此由四百里諭令知之○庚申左宗棠奏五月二十九日徐占彪令副將鄧增相度地勢於城西禮拜寺修築礮臺安置後膛礮位六月初一日連開一百五十礮轟塌城上女牆七處城身外面甃石坍卸三丈有奇礮子入土轟炸狀類蠡房而城身仍未迸裂初二日復轟一百五十礮傾圯之處亦多當令每營各挑壯士百名豫備乘勢登城賊於西城南北兩角伏匿死黨二三千名並於城上加砌橫牆以備堵禦夤夜將城上轟卸之處補砌完好徐占彪以城身堅厚轟攻驟難得手察看附城東關房屋櫛比舊爲市廛

埠頭城堞雖與內城一律然甃石厚而附城之土稍薄利於轟擊
初六日會商宋慶於關外叢冢中偪築營壘修立礮臺初八日夜
三更南稍門出賊七八百來攻城上城下又槍如雨徐占彪與宋
慶一面以洋礮劈山礮連環迎擊約斃悍賊百餘名一面會同各
軍督眾興工初九日各營卡成遂於營卡中急築礮臺三軍聲息
相接初十日未刻南稍門復出賊一二千分爲兩股一撲宋軍長
濠一撲徐軍水卡徐占彪以洋礮劈山礮憑濠轟斃十餘賊賊卽
遁宋軍越濠追勦賊復拚鬥不卻宋軍繞出賊後左衝右突勇氣
百倍金順又派隊前來助勦槍礮環攻賊向墳冢低窪處避匿俟
礮聲稍息仍敢直前猛撲時已晚矣徐占彪調後膛礮向賊叢連
轟十餘響斃賊數十名賊始敗竄入城金軍亦於東關重濠內偪
築礮臺與徐軍互爲犄角地勢均高於城俯矚關內瞭如指掌據

逃出漢民供稱城賊見官軍愈逼愈緊各懷怨忿由關外來援巨
酋馬六元帥卽馬得振圖向關外竄走土回馬四欲畱其共守堅
城然亦迄無成說十五日修築工竣礮臺距東關城垣僅一矢之
遠一濠之隔十六日徐占彪飭鄧增與守備陳文英疊轟百二十
礮毀城堞十餘處城身轟坍六七尺寬三丈有奇十七十八兩日
復增築礮臺高二三丈寬三丈有奇賊復於夜間囊土堆砌雜以
毡包草筐門片仍行堵閉十九日復轟塌之連日轟倒城身寬六
七丈高七八尺左右雉堞均經轟坍礮子飛入城中號哭之聲直
達城外其轟塌之土囊毡包草筐門片諸物堆積城根金順亦用
開花礮於東北角轟塌關城三四丈堞口十餘處正擬騰躍而上
惟關城緊隔一濠深約三四丈濠內注水約二三丈內有泉眼數
處冬夏不涸古所謂酒泉也賊於濠頭築壩蓄水深不可踰仍廢

然而返徐占彪派隊夜探濠口係用木椿密釘外加木板土封牢固難以決洩徐占彪飭各營穿暗渠避賊槍礮伏行至濠口併力紮卡以便開掘二十一二三等日南北兩稍門出悍賊千餘晝夜來爭連撲七八次均經官軍擊敗賊屍狼藉濠邊營卡已成金宋兩軍亦在東北東南兩角添築二壘聯絡聲勢賊見憤甚復拌死奮拒槍礮止短兵接官軍大呼陷陣與賊扭襟捉髮縱橫搏擊陣斃偽千長馬孔一名其餘悍賊死者無算閏六月初四夜壩頭掘開濠水漫溢徐占彪令用樹枝青草填濠賊擲火具焚之不果初五日徐占彪復飭各營多運土石填濠初六日晨餐後乘守賊稍懈徐占彪商宋慶各挑壯士越濠猛撲徐占彪親率總兵李玉春參將方友升遊擊武朝聘等首先登城賊由南北兩面擁擁來撲均頭裹白巾袒臂譁噪適金宋兩軍均蟻附而上立將東關克復

賊焚毀關內房屋糧料紛紛遁入大城閉門拒守其不及逃人者投井自縊並殲斃之賊不可勝計忽北稍門南稍門大南門各出死黨分路夾擊官軍之後時宋軍總兵姜桂題等擊退南稍門之賊總兵李寶林都司馬玉書等合金軍擊退北稍門之賊賊死傷塞路徐占彪一面派隊紮東關正門樓一面撥隊擊退大南門之賊宋慶紮東南角樓金軍紮東北角樓是日城賊見官軍已破東關出馬步四五百鏐撲官軍南濠意在解東關之危守南濠遊擊秦玉盛分三路怒馬馳擊斃賊四十餘名生擒賊目沙州五營僞元帥蘇洪有肅城大阿訇何幅榮馬玉修等初九日徐占彪督隊於中街紮卡守禦城內擁出賊二三千奮力奪卡徐占彪督隊巷戰卻之左股被賊槍子洞穿兩處幸尚未損筋骨初十日幫統蜀軍提督黃虎臣與先鋒營營官總兵李玉春率隊由大街直進金

順由大街之北宋慶由大街之南分三路於街中築壘距東城根約一矢之遠賊仍晝夜拚死來爭兇燄仍熾官軍時有傷亡蓋處於必死之地故鬪志益決也據城內投出回民馬咸奉供稱初九日撲卡之首逆馬得振卽僞元帥馬六又名馬正國本關外著名悍賊是日左額卒中槍子重傷卽時伏誅其餘悍賊死者甚眾宋慶所報亦同蓋卽徐占彪受傷之頃也刻下金軍開花礮逐日轟擊東北城堞時見摧倒徐占彪礮臺已成礮聲昕夕不斷宋軍於克東關時得有賊之大礮劈山礮宋慶令總兵宋得勝由南寨牆進紮偏至南稍門用礮對門施放又令提督蔣東才將城外東南長濠再向內緊偏添築營壘正在興工十七夜三鼓賊由北城縋出數百人猛撲金軍長濠當被擊敗各官軍偏攻東城而關上城外晝夜巡哨不遺餘力臣於閏六月初六日又派副將賴長添解

二號螺絲後膛礮一尊及後膛螺絲大礮合膛子並礮子千顆前往助剿據報二十四日可抵肅城飭一面開挖地道一面以大礮向城門轟攻或測向城中房屋多處施放務將踞逆擒斬淨盡立復堅城毋任一名免脫庶此處辦理得手將來關外各賊亦必聞風喪膽又奏竊維西北用兵利鈍在軍食之盈虛軍食之盈虛在採購之多寡轉輸之遲速而其要必先覈實各軍支食之人馬爲採運之准數然後支食之月日久暫可得而稽轉運之車馱道里採糧之遠近多寡可得而計也臣奉諭籌辦金順一軍糧運自應合關內外各軍糧料轉運按人馬實數兼籌並計然後支發維均不至有彼贏此絀之虞稽覈較易又可免冒領浮銷之弊除徐占彪一軍均係楚軍營制有冊籍可稽外其金順宋慶張曜三軍人馬實數無從得悉及詳查各軍馬步營制不一步軍有五百人爲

一營者亦有二三百人號稱一營者馬軍有二百五十騎爲一營者亦有百數十騎爲一營者若按照營數支發糧料不獨虛糜可惜且彼此相形之下多者與少者一例支銷必致爭論紛紜無以服其心而杜其口臣咨各軍詳詢人馬實數者以此旋准宋慶覆稱所部毅軍馬步共二十一營原因營官人才不齊故管帶之數多寡不一未能照步軍五百人爲一營馬軍二百五十騎爲一營之制然實計馬步戰勇共七千六百名加以每營長夫百名及隨員戈什車駝夫應領食軍糧者不下萬人戰馬四百匹各營駄運軍裝銅帳駝隻馬匹及統領營官隨員戰馬坐騎尙不在內今按實在人馬數目步軍照五百人一營馬軍照二百五十騎合計馬步共作十六營馬隊共作兩營每日每名計淨糧一斤十兩加以隨員人等統照萬人計算每月約需糧四十八萬七千五百斤料

四萬八千斤又准張曜覆稱所部馬步十四營步隊每營勇丁併長夫共五百名每日每營應支淨糧八百一十二斤半合計每月十二營需糧二十九萬二千五百斤馬隊兩營每營二百五十騎每日每營應支糧五百斤每月應支糧一萬五千斤戰馬五百匹每日每匹支料四斤每月應支料六萬斤統計馬步勇丁每月共需糧三十二萬二千餘斤料六萬斤其金順所部馬步實數臣處無冊籍可稽惟准咨開原二十一營加成祿一軍馬步十六營共馬步三十七營臣飭安肅道史念祖親往商詢實數再三婉懇始准照三十營計算然就臣所聞見言之照實數歸併金順所部不過十一二營成祿所部見存者不過數營今姑作二十營併算則人數已足一萬二千名其支發糧料章程照張曜宋慶兩營章程料之委屬有贏無絀此各軍應需糧食約畧數目也至轉運一節

張曜所部每月祇能自運一半宋慶所部駝隻車馱稍多亦須田局幫運至金順所部轉運牲畜則全需由局籌辦據史念祖稟金順所部照三十營支發糧料由肅州運玉門需駝二千八百餘隻由玉門運安西需駝三千五百餘隻無論駝價昂貴倍於從前無從設措且蒙古各旗因頻年被擾產駝不旺藉口居奇購辦益形艱阻臣所委赴各路員弁稟報相同見飭於內地回番部落重價搜羅未知能否得有成數如金順一軍馬步能覈實支發運腳尙資節省否則虛擁多營又將成坐食遷延之局且出關之舉不能專恃金順一軍將來必仍須從關內派撥此時既悉索以從後有勁旅又將苦於糧運不濟無從趨赴於機局殊有關繫此不得不從長計議豫爲陳明者也可否仰懇飭下金順深思兵貴精實之義汰去虛冗疲乏將弁兵勇歸併成營庶制勝有權免貽異日之

悔大局之幸亦金順與臣之幸也臣因西師久無成功此次出關須操全算未可仍前率略致啟戎心故不敢不盡其愚不僅爲糧料轉運暫圖省便起見至金順全軍餉銀據稱每年祇收到三十餘萬兩似實不敷臣無從查考可否飭下部臣查催俾免掣肘緣宋慶張曜兩軍皆議及津貼而金順兼統成祿所部若令據實冊報不可不明給津貼以昭平允而慰軍心謹一併據實馳陳伏乞皇上聖鑒訓示施行又奏見在關內大兵雲集將來出關轉運糧料軍火尤非多購駱駝不可臣前派都司張泰周克忠等帶領見銀前赴阿拉善並檄該旗協理台吉阿布哩派委妥弁導引至鄂爾多斯烏拉特三公哈喇哈等處挑買壯健駱駝又派後營守備白高年等帶銀赴鎮番等處採買駝隻旋據張泰等稟稱行抵阿拉善據阿台吉稱去年亢旱駝隻缺乏見有之駝係蒙古民人

馱運商貨不肯出售且駝價翔貴難以採買至各旗路途遙遠駝價更昂徒勞往返等語阿布哩自行呈覆無異又據白高年等稟稱蒙古游牧之駝均被蒙古印房調去以致駝價日昂等情臣維向例軍需調用蒙古駝隻原可無需用價卽照例發價每駝一隻給銀八兩而止此次臣念蒙旗疊遭兵燹特派員前往攜銀照時價收買原仰遵朝廷體恤藩部至意阿拉善縱無可購其烏拉特等處素係產駝之區探聞尙供採買乃該台吉阿布哩巧詞搪塞不但於本處一意推諉且並派弁引導亦敢任意阻撓且並將各處游牧之駝飭印房調去其擡價居奇致誤要需殊出意料之外臣前接張曜緘稱有蒙官貪利駝難採辦之說觀此益信除再嚴飭協理台吉阿布哩遵照妥辦並允多給價銀外相應請旨飭令阿拉善親王貢桑珠爾默特迅速回旗承辦以免貽誤 上諭軍

機大臣等左宗棠奏攻克肅州外城情形一摺與金順前奏大略相同見在各軍已偏城添築營壘併力轟擊左宗棠又派員押解礮位前往助剿賊勢窮蹙不難聚而殲旃卽著左宗棠飭令徐占彪會同宋慶迅將肅州剋期攻拔盡掃妖氛毋令一名漏網各營糧料轉運自應按照人馬實數覈實支銷以免浮冒見據左宗棠查明除徐占彪所部有冊可稽外宋慶馬步共作十八營張曜馬步十四營金順並接統成祿所部共作三十營並將轉運章程分別籌畫所奏甚爲詳悉著照所議將各該營應需糧料照數源源接濟毋令缺乏經此次覈定後各該營如有缺額以少報多冒領浮銷卽著該大臣隨時查明參奏兵貴精不貴多金順各營自可汰弱留強不必虛擁多營耗軍需而無實際著該前將軍酌度情形從長計議將各營歸併裁汰咨明實在數目以便左宗棠設法

供支各省應解金順及接統成祿一軍協餉著戶部查明催令迅解金順軍營以資應用毋得遲延阿拉善旗採辦駝隻意存推諉且有擡價居奇情事協理台吉阿布哩辦公未能踴躍著理藩院飭令貢桑珠爾默特迅速回旗承辦以免貽誤烏喇特等旗向係產駝之區足供採買著定安就近飭令各該旗會同左宗棠委員盡力採辦不准阻撓推諉將此由六百里各諭令知之○左宗棠奏河州東鄉逆目騎賊楊瞎油什康七箇子自去年漏網後率悍黨三十餘騎伺閒劫掠蹤迹飄忽異常諸軍雖星羅碁布探蹤合剿間有擒斬而元惡未除終爲可慮六月十三夜統領宗岳軍提督張仲春偵知該逆等由董家山竄入大東鄉張仲春立飭分駐甯河七甲集各營夤夜截剿自率馬隊向該匪舊踞之張岔莊追捕及抵該處賊又他竄緊追至那勒寺川時甫黎明遙見楊瞎油

什數騎飄瞥馳過張仲春策騎奮追該匪等盤馬開槍都司劉煥章中槍殞命張仲春憤甚驟馬而前撞楊瞎油什墜馬卽奪其馬該逆仍躍上他馬飛駛逸去張仲春卽騎所奪賊馬緊追適前阻深澗楊瞎油什所騎生馬未能躍過張仲春追及又恰遇副白旗馬隊馳至奮力夾擊陣斬悍賊數名立將匪首楊瞎油什康七箇子馬照清等三犯擒獲張仲春遂將夥黨馬照清一犯解交河州鎮沈玉遂引捕夥黨親押匪首楊瞎油什康七箇子解赴蘭州臣比訊明盡法處死梟示嗣據沈玉遂報續獲賊黨馬成明卽金溝滿拉馬尕五十馬喜兒馬兒洒馬勒黑馬主麻馬阿力木馬照清馬瞎力木馬良成卽馬合合馬瞎箇馬祿祿馬雙箇金如林等訊明斬決漢回番撒觀聞之下無不慶幸歡躍臣維楊瞎油什一犯本是河州劇盜向以出外劫掠爲生相貌不踰中人而馬上用槍

百發百中在河狄最稱絕技至今回民談之猶爲色變此次經張仲春窮追手縛實快人心報聞○壬戌諭軍機大臣等常順奏賊氛北竄馬隊遠難移撥一摺據稱探報陝回大股出關北竄匪蹤擾及阿畢爾米特游牧見飭官兵探剿前由杜嘎爾撥到之黑龍江馬隊一時未能撥赴榮全軍營懇請飭撥勁旅迅速來烏再令黑龍江馬隊西進等語此項馬隊本係榮全調赴西路之兵該處需兵甚亟本難准其所請惟見在同匪大股分竄烏城兵力甚單黑龍江馬隊駐防察漢淖爾等處未便遽行撤動著准其暫畱防剿以遏賊鋒並著李鴻章於宣化官兵內挑選五百名剋日整隊赴烏前據李鴻章奏直省練軍未便再議抽調惟見在關外軍情緊要該督務當酌度緩急迅行調派毋稍遲延該官兵抵烏後常順等卽飭黑龍江馬隊馳赴榮全軍營俾資戰守逆匪由胡魯斯

泰地方逸去見竄何處著常順車林多爾濟文奎嚴飭官軍確切偵探視賊所向實力擊剿迅殄逆氛並將該城防守事宜妥爲布置不得稍涉疏虞另片奏逆匪圖竄烏魯木齊請飭迅克肅州俾金順得以率隊出關並請飭景廉速剿踞賊等語該逆麇聚於安西敦煌等處覬覦北犯儻任令勾結烏魯木齊踞匪該城軍務更覺棘手著景廉督飭官軍力籌堵剿毋令該逆聲息相通益形滋蔓肅州外城已克當不難一鼓而下著左宗棠檄飭各軍加勁圍剿迅奏膚功金順當懷遵疊次諭旨迅速出關將白彥虎等股匪黨痛加剿洗毋任豕突將此由五百里各諭令知之○癸亥允萬青藜等奏截留通倉漕糧八萬石賑順天被水災民○內寅諭內閣本年永定河決畿輔被災甚廣亟應妥籌撫恤著於東南各省釐金關稅鹽課項下各撥銀三四十萬兩以資賑濟一面於直隸

藩運各庫內無論何項先行動支○己巳諭軍機大臣等都興阿奏股匪肆擾派隊擊散一摺匪首趙西來孫洛好等率黨百餘人由大孤家子屯擾及卡拉營子一帶經派出蒙古官兵馳至何家屯地方追擊斃賊多名餘匪逃匿新立屯等處復有匪目趙中等率賊七八十名圍聚滋擾副都統德昌督隊馳抵羊羔屯地方緝捕將該匪及另股接應之賊擊敗餘賊竄逸此起賊匪乘禾稼茂密之時伺隙紛竄豈可任其勾結致成滋蔓且邊內外賊匪股數向多亟宜加意接捕著都興阿督飭派出各員弁實力分投確探痛剿不得任令四出竄擾並將匪首趙西來等按名弋獲不准一名漏網以清伏莽而遏亂萌將此由四百里諭令知之○辛未諭軍機大臣等崇實奏東荒沿邊一帶匪徒滋擾調隊會剿並酌撥餉需一摺匪首莊洛三卽莊洪汰在奉省東魯荒等處糾邀著名

馬賊王江王海及蒙賊鐵千一隻燭等沿途裹脅赴朝陽縣東荒一帶挾嫌報復崇實因該處兵力單薄已咨商李鴻章等在古北口練軍內調撥馬隊官兵一百名前往剿辦即著嚴飭帶隊各員會同該處地方文武將此股匪徒迅速撲滅匪首莊洛三等務須悉數弋獲不准一名漏網該縣見募勇丁籌備防剿所需經費崇實擬於熱河道庫內暫行動支造冊報銷著照所請辦理將此諭令知之○諭金順奏關外逆匪被剿竄遁並偏攻肅州情形一摺逆匪分擾安西敦煌等處經副都統明春總兵胡可均等帶隊截擊均獲勝仗擒斬頗多金順復派副將和正興等選帶隊伍出關接應文麟所派馬隊亦到該逆於閏六月十七等日遁逸入山勢將由南山西竄該逆見竄何處有無分股著景廉文麟督飭官軍確切分探嚴防痛殲醜類毋任蔓延安敦玉雖已解嚴仍著金順

文麟飭該官兵等按捕逸匪實力探勦不得稍涉疏虞肅城自攻克東關後各軍添築卡壘連環攻擊不難一鼓蕩平著左宗棠金順督令各該將領剋期攻拔將該處踞匪聚而殲旃以安邊圉金順一面部署出關事宜早日成行毋稍遲緩此次關外出力各員弁著該前將軍俟肅城克復後併案覈實請獎將此由五百里各諭令知之○予甘肅陣亡副將李天和祭葬世職○癸酉申諭順天直隸編查戶口核實散賑○甲戌允兵部奏復武職回避舊章並召各省實缺提鎮入覲○寶珣以病免以恩麟爲兵部右侍郎

由左副都御史遷

○乙亥左宗棠奏閏六月十一夜十六等日幫統蜀軍

提督黃虎臣合金順宋慶兩軍進逼城根修築營壘賊拚死來爭黃虎臣督隊巷戰卻之十七日復於大街壘卡中修築礮臺用大礮對門施放並開挖地道二十日徐占彪以各軍進紮關廂長濠

頗覺空虛徐占彪又因調治腿傷未能領隊慮賊從南突竄遂商金順宋慶兩軍仍駐東關徐軍移紮長濠並令黃虎臣於大南門外偪城修築礮臺豫備轟攻二十五日礮臺將成適臣續派助攻之總兵銜副將賴長管解後膛礮並開花礮子到營二十六日徐占彪飭蜀軍新左正右兩營連夜修築營卡二座距南城根不及半里二十七日辰刻賊見官軍紮卡扼其吭賴長開放大礮轟坍三垛忽大南門突出悍賊二千餘分兩股飛奔奪卡維時卡牆甫成弁丁正搬運鍋帳守卡兵單不能抵禦兩卡均被奪踣參將方友升見賊已入卡牆率所部騎兵下馬陷陣賊均出卡猛撲槍子雨注方友升頸中飛子重傷直貫脊骨賊乘勢直撲礮臺賴長令礮隊勇丁用洋槍測準連斃悍賊十餘並開大礮擊後隊之賊及踞卡各賊轟斃甚多維時鄧增亦由濠內馳至助同守禦開礮轟

擊左手指被槍子斷折徐占彪時正養傷營內急調各營馳援賊見援兵大至又所踞卡牆已經大礮轟坍無可藏匿仍狂竄入城徐占彪飭各營仍將原築營卡修築撥將弁固守此次力戰陣亡守備王安邦楊世泰李春雲千總劉映富李占奎李長勝楊得貴胡均貴曹國洪余占春張有貴熊玉山合無仰懇 天恩飭部各照官階從優議卹以慰忠魂 臣維金順宋慶與徐占彪會攻肅城以來遇事和衷商辦均稱得手攻具又已陸續到齊孤城自可計日攻拔惟肅州本邊關重鎮堅厚異常而城逆及援逆處必死之地斷無束手待盡之理負隅窮寇必決死戰固在意中徐占彪傷尚未愈未能親歷陣前 臣自應親赴肅州察酌形勢就近妥商辦理而出關糧運一切必須與金順面商督飭安涼兩道妥爲籌辦又西路各軍雲集游匪每多混雜其中宜及早拏辦以靖地方而

各郡縣善後事宜尤非親歷各處諸訪利病難期周妥此臣親赴西路之行所以不可緩也謹擬拜摺後於十九日卽率隊啟行

上諭軍機大臣等官軍克復東關後復於大南門外偪城修築礮臺營卡該逆分股占踞兩卡經副將賴長等開礮轟擊仍奪回原築營卡固守該大臣見在親赴肅州卽著與金順會商督飭各軍力籌進剿迅克堅城肅逆勢極窮蹙左宗棠金順務當嚴密布直鎖合長圍就地殄除毋令城賊乘間出竄又成不了之局各郡縣善後事宜及金順出關後糧運一切卽著左宗棠親歷該處妥籌辦理本日據景廉奏回目馬明投順安夷並有西攻綏來之說若句結該處逆回撲犯沙山子等處見存勇丁無多防剿均不足恃請飭金順來古助剿等語著金順一面部署出關事宜振旅西行與景廉聯絡聲援以資戰守將此由五百里各諭令知之○諭景

廉奏回目馬明投入安集延並逆匪撲犯民團派隊援應各等語
馬明乞撫本不足恃見在該逆與瑪納斯回匪均投併安集延逆
敵頗張景廉務當督飭官軍慎守營壘嚴防東犯不得稍涉疏虞
趙興體等營勇均係烏合之眾屢經逆匪撲擾勢難支持景廉見
派馬隊前往援剿著飭令該官兵迅速西進聯絡民團實力防剿
以遏賊鋒沙山子地居要隘該都統咨會錫綸帶兵會同榮全所
部進駐該處以壯聲勢而固民心卽著該都統等彼此會商妥籌
辦理安集延久踞烏城勢甚兇悍非厚集兵力難以得手見在肅
州一城指日可克前據左宗棠奏金順一軍請俟秋仲出關本日
已寄諭金順令其迅速振旅西行該都統另摺奏請撥軍火已諭
定安常順等照數撥給矣將此由五百里諭令知之○丙子諭錢
鼎銘添撥銀四萬五千兩備黃河工需○是月豁免山東青城縣

被水新舊錢糧